

哈密志卷之三十一

武備志五

恩賞紅白事銀兩

協營並沁蔡兩屯兵丁賞卹紅白銀兩前於乾隆三十四年奉到陝甘總督部堂明山批飭各營紅白賞項自是年七月初一日起卽在營中公項銀內先爲借墊隨時通報俟請領官兵俸餉掛發歸欸彼時屯兵紅事每名賞銀四兩白事賞銀六兩在營各兵減半之例紅事賞銀二兩白事賞銀三兩嗣於道光八年奉文議定裁減三成祇給七成屯兵紅事賞銀二兩八錢白事賞銀四兩二錢在營各兵紅事賞銀一兩四錢白事賞銀二兩一錢每年額撥紅白賞銀一百六十五兩七錢四釐統隨巴里坤鎮標請領到營賞散倘有餘剩仍繳司庫歸欸抑或不足再爲找領